

晴  
川  
後  
蟹  
錄

序蟹

太元一六爲水類爲介爲穴爲膏蟹水蟲而穴處者  
與披甲而介者與腹腴而膏者與以水注有剛  
火質而剛者與剛故不屈有時而折蟹殼堅而脆者  
與火性炎上而就燥蟹又火燥者與其智不如龜之  
骨可鑽也其廉不如蚓之心自一也文以介士之容  
不足衛身也借託蛇蟪之穴弗能久居也實以膏腴  
之腹還供人飽也第其首必東向執穗朝魁似明乎  
君臣之義貴賤之等故君子時有取焉

目

卷一

事典

卷二

賦咏

卷三

食憲

卷四

拾遺

晴川後蟹錄卷之一

仁和孫之騷

編輯

事典

若士

神仙傳若士者古之仙人也莫知其姓名燕人盧敖者以秦時遊乎北海經乎大陰入乎玄闕至於蒙穀之山而見若士焉其爲人也深目而玄準鳶肩而修頸豐上而殺下欣欣然方迎風而儻顧見盧敖因遯逃乎碑下盧仍而視之方踰龜殼而食蟹蛤盧敖乃與之語曰唯以敖焉背羣離黨窮觀六合之外幼而

好遊長生而不渝周行四極惟此極之未窺今觀夫子于此殆可與敖爲友乎若士泯然而笑曰嘻子中州之民不宜遠而至此此猶光乎日月而載乎列星比乎不名之地猶窳奧也昔我南遊乎潤溷之野北息乎沉嘿之鄉西窮窈冥之室東貫鴻洞之光其下無地其上無天視焉無見聽焉無聞其外猶有沃沃之汜其行一舉而千萬餘里吾猶未之能究也今子遊始至于此乃語窮觀豈不陋哉然子處矣吾與汗漫期于九陔之上不可以久駐乃舉臂竦身遂入雲中盧敖仰而視之不見乃止恍惚若有所喪也敖曰

吾比夫子也猶黃鵠之與壤蟲也終日行不離咫尺而自以爲之遠不亦悲哉

### 鹿宜孫

雲仙雜記鹿宜孫食蛭蟪炙于壽陽盃內頓進數器

### 解殼

埤雅廣要蟹解殼故曰蟹蟹螯曰寅

### 輸芒

王梅溪會稽風俗賦輸芒之蟹孕珠之贏文身合氏

之子

蛤有文故謂之文蛤元微之詩鄉味尤珍蛤合氏子見東坡江瑤柱傳

跋足從事

之徒街填巷委與土全多

月入金卷之二  
緯蕭

莊子曰河上有家貧恃緯蕭而食者其子没于淵得千金之珠其父謂其子曰取石來鍛之東坡詩夜光明月空自投一鍛何勞緯蕭手

郭索

太玄蟹之郭索心不一也

𧄸蟹

蟹蛻必以秋其匡初蛻柔弱如綿絮通體脂凝紅黃雜糅結爲石榴子粒四角充滿手觸不濡是名𧄸蟹然每年四月八日潮不大長是日𧄸蟹尤多故諺有

云四月八日與蟹爭出則蟹亦以夏而蛻矣

### 石蟹

一統志臨川水在崖州東一百三十里唐以水名縣中產石蟹漁人采之初頗軟出水堅硬如石

劉基活水源記活水源其中有石蟹大如錢有小鱖魚色正黑居石穴中有水鼠常來食之

西溪叢話南恩州海邊有石山背蟹過之則化爲石又石蟹生于崖之榆林港內半里許土極細膩最寒蟹入則不能運動片時則成石矣人獲之則曰石蟹相傳置之几案能明目在海南



桂海虞衡石蟹生海南形真是蟹云是海沫所化理不可詰又有石蝦亦其類

末齋雜言肇慶瀕海處有石蛇石蟹之屬首足尾甲皆具

賈似道悅生隨抄云蛇蟹蠶皆成石萬物變化不可以一槩斷

### 白蟹

都昌柴棚鎮有古松一株明太祖征陳友諒時駐蹕其下萬曆甲申知縣王廷策卽地建亭掘得白蟹一枚畜之江又建前亭豎梁有赤鯉從空飛下

## 鰲蟹

廣東新語鰲大者尺餘如覆箕其甲瑩滑而青綠眼在背口藏在腹其頭蜣螂而足蟹足蟹而多其四尾三稜長一二尺其血碧其子如粒珠出而爲鰲者僅二餘多爲蟹爲螳蝦麻蝦及諸魚族蓋淡水之魚多生於魚鹹水之魚多生於鰲鰲乃諸魚蝦之母也鰲者候也善候風諸水族亦候之而出故曰鰲性喜群遊雌常負雄于背背有骨如扇作兩截常張以爲帆乘風而行雌雄相積雖遇驚濤不解名曰鰲帆漁者每望其帆取之持其雄則雌者不去如持其雌則雄

去矣然失雄亦不能獨活故曰鸞媚取之又多以夜  
凡海中夜行舉棹潑浪則火花噴射鸞蟹之屬緣行  
沙渾亦一一有火花水鹹成火漁者每拾一火則得  
一鸞蟹之屬蓋海族多生于鹹鹹火之渣滓也海族  
得水之清虛者十之三四得火之渣滓者十之五六  
介之類爲離離爲火鸞蟹者火之渣滓所生者也水  
之清虛所生者知雷火之渣滓所生者知風豚魚與  
風相孚鸞亦然

鸞雌大而雄小諺曰香山鸞雌長雄幼雌稍大常負  
其雄得其雙者乃可食單者及身小名鬼鸞者與尾

有鋸刺者不可食漁者殺而賣之中有清水二升許不肯棄云以其水同煮味乃美非水也血也以色碧故不知其爲血也

水者火之本水潤下作鹹則火炎上作苦海族生于潤下卽其生于炎上者也凡蠶蟹之屬置陰處皆有火光鯉魚亦有火元微之送客遊嶺南詩曙朝霞睽睽海夜火燐燐謂蠶蟹之屬也

### 瑣珞

瑣珞狀似珠蚌殼青黑色長寸許大者二三寸生白沙中不汙泥淖有兩肉柱能長短又有數白蟹子在

腹中狀如榆莢合體共生然瓊瑤清潔不食但寄其腹於蟹蟹爲瓊瑤而食食在蟹而飽在瓊瑤故一名共命羸又曰月蛄每冬大雪則肥瑩滑如玉味甘以柔蓋海錯之至珍者諺曰霜蟹雪羸味不在多凡羸皆以雪肥蟹則以霜翁山詩云霜肥羸有桂月滿蟹多黃有紅羸腹中亦有小蟹漁者率釣取之又有海鏡有紅蟹子爲取食一名石鏡其腹中小蟹曰蚌孖任昉謂之筋

### 寄居蟹

居蚌腹者曰蠣奴一名寄居蟹

閩部疏莆中寄生最奇海上枯羸殼存者寄生其中載之而行形味似蝦細視之有四足兩螯又似蟹類廣東新語有寄生羸生鹹水者離水一日卽死生淡水者可久畜殼五色如鈿或純赤如丹砂其蟲如蟹有螯足腹則羸也以佳殼或以金銀爲殼稍炙其尾卽出投佳殼中海人名爲借屋以之行酒行至某客前而駐則飲故俗以爲珍有螭螯者二螯四足似彭蠡其尻柔脆蜿屈則羸每竊枯羸以居出則負殼退則以螯足扞戶稍長更擇巨殼遷焉與寄生蟲異名多足羸亦曰竊蟬越記負屋之螯飼以雲母能產白

珠梅華國志屋蟬千歲出海爲螯龍蓋此物也

### 蟹利

沈括崇德縣儒學記吳越多山而湖澤漸其下其枝者崖渚之間不辨牛馬崇德居山澤之介孔道四出戰國之時闔閭勾踐嘗大戰於檣李禦兒之間裂其地而守之至今墟壠網絡稻蟹之利轉徙數州

### 蟹食

秋深盛寒蟹食白蜆子而肥

### 蟹子

蠡海集蝦與蟹堅在外離象也熟而色歸赤離中含

陰陰中不生故蝦蟹之子皆在腹外

佛書言蟹散子後卽自枯死

### 蟹母

蟹雌者子滿腹中殆無空隙炎海之蟹不孕子皆蠟子所化九爲蟹十一爲蠟也蠟者蟹之母然獨炎海之蟹母之他處無蠟蟹之所生又異矣

### 蟹山

蟹山在海寧縣治東六十三里高五丈週廻半里

### 蟹泉

墨客揮犀蒲陽壺公山有蟹泉在嵌崑之側一丈大



可容甃其源常竭求涓滴不可得州縣遇旱膜卽遣吏齋沐置淨器于前以茅接之泉乃徐徐引出滿器而止有一蟹大如錢色紅可愛緣茅入器中戲泳俄頃乃去若遇蟹出雨必需足此亦應天鰻井之類也方輿勝覽象耳山在彭山縣有楊祐甫十事記一口象耳山二曰彭祖宅三曰大悲道場四曰寶現磨鍼二溪五曰太白書室有石刻太白留題云夜來月下臥醒花影零亂滿人襟袖疑如濯魄于冰壺也六曰師悟志栖二大士會昌寺七曰薛范二詩八曰龍池蟹泉九曰千歲松栢十曰石恪畫護身法

徐熙畫

米襄陽志林雒陽張狀元師德家多名畫周文矩士女徐熙鰕魚蟹皆有丁晉公親題印

蟾蜍州

薛方山通志蟾蜍生海邊泥穴中舒懶堂述里諺云八月蟾蜍健如虎前賢多呼四明曰蟾蜍州

貞女化霧

元池說林金陵極多蟬古傳有巨蟹背圓五尺足長倍之深夜每出嚙人其地有貞女三十不嫁夜被盜逃出遇巨蟹橫道忽化作美男子誘之貞女怒曰汝

何等精怪乃敢辱我我當化毒霧以殺汝遂自觸石而死明日大霧中人見巨蟹死于道上于是行人無復慮矣至今大霧中蟹多僵者故云落蟹怕霧

### 蟹捲鬼像

夷堅志吳興鄭伯膺監楚州鹽場曹局與海絕近常覩龍掛或爲黃金色或青或白或赤或黑蜿蜒天矯隨雲升降但不覩其頭角土人云最畏龍窩每出則必有漲潦大爲鹽鹵之害一旦忽見之乃平地竄出一窟傍穿深竅蓋龍出入之處也場衆往視無復踪跡滿穴皆龜鼈螺蚌或于蚌內作觀音像姿相端嚴

珠璣纓絡楊柳淨餅無不備具又于蟹椀內一鬼毛  
髮森立怪惡可怖如是者非一鄭取數物藏貯之今  
爲浮梁令間以示客

煮茶

惠洪烹茶詩山童解烹蟹眼湯先生自試鷹爪芽今  
人以蟹吐沫聲謂之煮茶諺云蟹鳴嘉客至

佐酒

鄭東白遊赤松山記已酉九月九日遊赤松山山澗  
底皆錯落大石可移其水清冽因命從者下水堤石  
作洄湍屈曲勢擇平者雜布爲坐諸客各據一石令

小僮取盤盞酌酒置上游沂流而下稍泊其坐者飲之從者旋進肴核各錯布諸石上水中有小蟹如大錢者間橫行盤盞間命童拾之烹以佐酒亦一異品云

草名

有蟹眼蟹殼

蟲名

拾遺記石蟹其形如蚱蜢而小身長兩股如蟹在草頭飛螽之類也而與蚯蚓交

南食

王十朋和南食詩翻笑魚蟹蝦晨夜何營營

東首

蟹海族行必東首

蟹奴

宋狀元樂雷發詩魚婢蟹奴供俎豆為人龍戶雜耕桑

蟹杯

顧太初說畧蟹杯以金銀爲之飲不得其法則雙螯鉗其唇必盡乃脫其製甚巧戴石屏詩落木三秋晚黃花九日催何當陪勝踐共把蟹螯杯

方言

雞林類事方言鼈曰團蟹曰慨魚曰水脫

寄語

寄語畧魚曰遊河蟹曰指泥虱曰未諫水鼠曰服助

來

寄卽譯也西北  
曰譯東南曰寄

關公蟹

閩小記通州如臯有虎蟬俗呼爲關公蟹

烈士槌

東坡詩紅螯烈士槌

諸市

武林舊事蟹行新門外南上門鮮魚行候潮門外

酒樓

每樓有賣玉面狸鹿肉糟決明糟蟹糟羊蹄酒蛤蜊  
柔魚蝦茸鱗乾者謂之家風又有賣酒浸江瑤章舉  
蠓肉龜脚鎖管蜜丁脆螺烹醬法蝦子魚鯉魚諸海  
味者謂之醒酒口味

市食

市食炒螃蟹薑蝦米蒸作從食蟹黃鵝項子母龜雞  
頭籃兒

小經紀



蛇蚪兒小螃蟹蟲蟻食魚兒活名什甚多不可悉數  
每一事率數十人各專藉以爲衣食之地皆他處所  
無也

發棺

廣五行記宋元嘉中章安縣人嘗屠虎至海口見一  
蟹匡大如筮腳長三尺取食甚美其夜夢一少姬語  
云汝噉我肉我食汝心明日其人爲虎所傷

述異記出海口北行六十里膳輿之南溪有溪水清  
徹照底有蟹焉筐大如筮腳長三尺宋元嘉中章安  
縣民屠虎取此蟹食之肥美過常其夜夢一少姬語

之曰汝噉我知汝尋被噉不屠民明日出行爲虎所食餘家人殞瘞之虎又發棺噉之肌體無遺此水至今猶有大蟹莫敢復犯

鳴冤

湖壩雜記藩司治前有百獅池甚深廣順治八年季冬群兒繞欄嬉戲忽見赤蟹浮于池上共訝嚴寒焉得有此遂鈎取之有囊吞鈎而起舉之甚重視之一肢解人也急報藩伯藩伯陳姓曰蟹具八足此間豈有行八之人與名八之地乎一卒曰去司不遠八足子巷中有丁八藩伯曰逮捕之至則遁矣廉得巷中

有皮匠婦與丁八有私而匠復數日不見鄰人疑而舉之捕匠婦一訊而伏誠與丁八成謀以皮刀磔匠而沉之池將偕奔而未迫也獄成究不得八藩伯旋開府粵西偶至一山寺寺僧具迎隨開府者一童子忽報一僧曰殺人丁八在是矣僧失色開府曰若安識之童子曰予鄰也雖變服而貌不可變童子蓋浙人而挈之以適粵者也旣得八械送之浙同伏法

脂同切玉

北墅抱甕錄分湖稻蟹極肥脂同切玉搗薑薦之以佐村釀誰謂荒寒寂寞之濱遂無佳味哉

膏色湛金

劉屏山詩光螺暈紫斑簟膏湛金色蟹躁輒橫鶩鼈縮常畏出

江南蟹雄

癸辛雜志江南蟹雄螯堪敵虎然處蒲葦間一燈水澣莫不郭索而來悉可俯拾捕蟹者未聞血指也

龍井小蟹

武林舊事吳赤烏中葛稚川嘗煉丹於此在簞篁嶺上巖壑林樾幽古石竇一泓清澈翠寒甘美可愛雖久旱不涸石上流水處其色如丹遊者視久水輒溢

人去卽滅其深不可測相傳與江海通有龍居之每  
禱雨必應或見小蟹斑魚蜥蜴之類井傍有惠濟龍  
王祠

金相玉質

黃魯直詩一腹金相玉質兩螯明月秋江

解甲流膏

羅鄴詩黃金解甲肌膚實白玉流膏骨髓香

灌菊

群芳譜以死蟹釀水澆菊花則莠虫不生

具饌

清異錄二三友來訪買得蝦蟹具饌

寺壁畫蟹

風李秀者不知何許人佯狂奇譎人因呼云洪武末秀已老托跡燕府嘗至後宰門側一寺寺壁新塋潔甚僧將募工圖之秀曰我爲汝畫顧簷下一筐中有瓠項甚多秀一一取之醺墨印壁上僧恚詈秀曰無庸怒因取筆寫其下成沙灘之狀瓠迹傍一一加以螯足悉成蟹俯仰傾側態狀各異望之蠕動如生焉後展京城折寺勅勿毀此壁輦致門外某寺

釣蟹得元

祝子志怪錄吳縣賀解元恩戊子歲與二士同舟赴試途次見釣者賀謂二士曰吾三人借釣竿各卜之釣得蟹者爲解元魚蝦雜物者與中列空餌者下第二士先之一得魚一無獲賀一釣而得兩蟹後果如卜二士忘爲誰

煮彭蠡

東坡讀孟郊詩初如食小魚所得不償勞又似煮彭蠡竟日嚼空螯

換青錢

明王叔承南京游記云燕子磯巖之下多漁人設簪

或依沙洲石瀨爲舍或浮舍水上或隱其身山罅或就崖樹下懸居或將魚蟹向客賣換青錢或就墟換酒竟去悠悠天地此何人哉

### 殺生

東坡云余少不喜殺生時未斷也近年始能不殺猪羊然性嗜蟹蛤故不免殺自去年得罪下獄始意不免旣而得脫遂自此不復殺一物有餉蟹蛤者放之江中雖無活理庶幾萬一便不活愈于煎烹也非有所覲但已親經患難不異雞鴨之在庖廚不復以口腹之故使有生之類受無量怖苦爾恨未能忘味食



自死物也

海錯

王世懋閩部疏陶方伯嘗言閩中海錯定虛得名耳  
余怪問何以曰蚶不四明蛤不楊州蟹不三吳余大  
以爲然蚶大而不種故不佳蛤乃車螯非蛤蜊也蟹  
之別種曰蟬蟾吾地名黃甲此名海蟬特多此種而  
蟹乃異狀不中食此又是一種非真蟹也獨興化數  
里河中有蟹形味俱似吳中而土人不之重豈曰厭  
海錯不能別味耶

生日斫蟹

王梅溪生日示聞詩聞禮詩云身雖五馬已二毛烹  
羊擊鮮斫蟹螯

樽前風味

文徵明詩云池上秋容霜點葉樽前風味蟹流膏

羹蟹

關尹子庖人羹蟹遺一足几上蟹已羹而遺足尚動  
是生死者一氣聚散爾不生不死而人橫計曰生死  
蟹潛

韓持國詩蟹潛石穴幽魚泳柳根暗

地形

地理書有螃蟹夜遊螃蟹盤湖螃蟹出泥等名又雙爪太陰名曰蟹鉗金側腮太陰形如螃蟹橫行裏頭太陰號爲橫蟹又蟹足曜星極貴而難合格又生氣吐出謂之蟹眼螃蟹之形宜遷眼上有游魚作案故曰金蟹捕魚又祿存星如值螃蟹形謂之祿存帶殺

貝類

廣東新語徐聞之西每天霽海水清澈見底渾然砥平皆石也石上多有石欄杆海菜鐵樹雲根石菌靈栢上芝等物沙中復有羸蛭蜃蜎蠃蚌蛤蚌之屬凡古之威斗大鍾刑鼎瓊弁敦牟卮匱以及罍缶甌缶

豆區捲筍之狀無不備具磨盪既久肌理滑瑩皆作  
五色光恠有客嘗披拾之凡得貝類三百餘羸類五  
百餘蛤類二百餘石類一百餘樹類五十餘其最精  
麗纖巧如相思子甲香指甲羸石羸石蟹石燕琤渠  
璚瑁等有六十餘種一一不同是皆所謂貝也

### 蟹螯

柳子厚遊南亭詩留連俯櫺檻注我壺中醪朶頤進  
芟實擢手持蟹螯明蔣之翹注螯大蟹也

芥隱筆記宋景文詩蟹美持螯日魚香抑鮓天用楊  
淵五湖賦連鮓抑鮓

醉銘茂世紫螯張翰青蓴全不知味何由辨珍

蟹螯

張孟陽詩黑子過龍醢果饌踰蟹螯

焚蟹

傭吹錄焚蟹黃而致鼠囊螢火而聚魚青溪暇筆蟹

烟集鼠人肌粉犀

亘蟹

路史五勝相感篇皂莢亘蟹黍以蟹散

母蟹

唐庚詩須信子魚藏妙理坐令母蟹愧凡才

雨蟹

路史天雨鰕蛤贏蟹蟹

科斗蟹屬

古云雨蟹兵喪

蟹類

正字通蟹類甚衆其名亦殊大而有虎豹文者曰虎  
蟬行泥塗中者曰攤塗似彭蜼可食殼薄而小者曰  
蟪搏土作丸滿百丸而潮至者曰數丸出於海者名  
蟹濶殼而多黃者名蟻其螯最銳斷物如芟刈焉  
嶺表錄異紅蟹殼殷紅色巨者可裝爲酒杯虎蟹殼  
上有虎斑可裝爲酒器皆產瓊崖海邊雖非珍奇亦  
不易采得也

水蟹敖殼內皆鹹水自有味廣人取之淡煮吸其鹹汁下酒黃膏蟹殼內有膏如黃酥加以五味和殼燂之食亦有味赤蟹殼內黃赤膏如雞鴨子黃肉白和膏實殼中淋以五味蒙以細麴爲蟹饌珍美可尚

### 蟹辯

西溪叢語蔡謨初渡江見蚶蜆大喜曰蟹有八足加以二螯令烹之既食吐下委頓方知非蟹詣謝尚而說之尚曰卿讀爾雅不熟幾爲勤學死據荀子勸學篇云蟹六跪而二螯注云跪足也引說文云蟹六足二螯首也今考神農本草蟹八足二螯其類甚多六

足者名蛭音跪四足者名北皆有大毒不可食爾雅云  
蝟蟬曰蝟卽彭蝟也似蟹而小蝟王穴切謝尚云讀  
爾雅不熟必爾雅說蟹今本止有彭蝟一事而他更  
無恐爾雅脫文也勤學當作勸學恐晉書本誤以勸  
爲勤也建康實錄所引不誤今許叔重說文云蟹有  
二螯八足旁行楊倞引云六足亦誤又衍一首字亦  
誤韓非子云蟹螯首如鉞卽當有首字文字脫落疑  
誤學者可爲嘆息

### 蟹畧

蟹畧四卷高似孫續古撰



蟹評

晴川子曰蟹之爲物也外剛殼脆其鑽穴如穿窬然  
夫子所謂色厲內荏譬之小人者與

飛頭老子

酉陽雜俎嶺南溪洞中有飛頭老子頭將飛一日前  
頸有痕匝項如紅縷妻子遂看守之其人及夜狀如  
病頭忽生翼脫身而去乃於岸泥尋蟹蚓之類食將  
曉飛還如夢覺其腹實矣

貴州變婆

剽錄貴州平越山寨苗婦年六十餘萬曆丙戌秋日

入山逃不能歸接食水中螃蟹充饑不覺遍體生毛  
變形如野人與虎交合夜則引虎至民舍爲虎啟門  
攫食人畜或時化爲美婦不知者近之輒爲所抱持  
以爪破胸飲血人呼爲變婆

### 冶鳥

博物志越地深山有鳥如鳩青色名曰冶鳥白日見  
其形鳥也夜聽其鳴人也時觀樂便作人悲喜形長  
三尺澗中取石蟹就人火間炙之不可犯也越人謂  
此鳥爲越祝之祖

### 山都

鄧德明南康記云山都形如崑崙奴身生毛見人輒閉目張口如笑好在深澗中翻石覓蟹噉之

### 山獐

眉公書蕉西方深山中有人焉其長尺餘袒身捕蝦蟹性不畏人見人止宿喜依火以炙鰕蟹伺人不在而盜人籃以食蟹名曰山獐其音自叫人常以竹箸火中爇燂而山獐皆驚犯之令人寒熱

### 大蟹

呂氏春秋非瀆之東夷穢之鄉大解陵魚

### 珠蟹

蔣德璟珠經璣珠人形者曰珠佛齊永明中越州獻  
白珠像是也長三寸物形者曰珠魚如魚珠螺如螺  
珠蟹如蟹

蛤蟹

狄遵度杜甫贊云詩派之別源遠乎哉波流沍沍乃  
自我回蹲崑崙巔足亂四溟覩縷蛤蟹拘致鯢鯨蛇  
蜥委瑣巨細雜并

螺蟹

崔伯易高郵西北甓社湖珠賦云魚則鯉鯽鰕鱖  
鯁鱸魴蟲螺蟹若蝦蛤



酒餽之最劾曰生魚熊掌孟子所稱雞跖猩唇呂氏  
所尚鹿尾乃有奇味竟不載書籍每用爲恨孝儀曰  
實自如此或古今好尚不同梁賀季曰青州蟹黃乃  
爲鄭氏所記此物不書未解所以騫曰鄭亦稱益州  
鹿殘但未是尾耳

### 鏡溪蝦蟹

白玉蟾鏡溪序若蝦若蟹總受羅籠是魚是龍更無  
回避

### 寫經

冥報記唐龍朔元年洛州景福寺比丘尼修行房中

有侍僮伍五娘死後修行爲伍娘立靈座經月餘日其姊及弟于夜中忽聞靈座上呻吟其弟初甚恐懼後乃問之答曰我生時于寺中食肉坐此大苦痛我體上有瘡恐汚床席汝可多將灰置床上也弟依其言置灰後看床上大有膿血又語弟曰姊患不能縫衣汝太藍縷宜將布來我爲汝作衫及襪弟置布於靈牀上經宿卽成又語其姊曰兒小時染患遂殺一螃蟹取汁塗瘡得差今入刀林地獄肉中見有折刀七枚願姊慈愍爲作功德救助之姊煎迫卒難濟辦但隨身衣服無益死者今并未壞請以用之姊未報

問乃曰兒自取去良久又曰衣服取來見在床上其姊試往觀之乃所歛之服也遂送淨土寺寶獻師處憑寫金剛般若經每寫一卷了卽報云已出一刀凡寫七卷了乃云七刀並得出訖今蒙福業助卽往託生與姊及弟哭別而去錄此條開後世寫經公案但旣託生後再食螃蟹奈何

### 發願

昔人有過嗜蟹者以寒致疾其友戒之遂發願云願我來世蟹亦不生我亦不食

### 蟹夫



朝野僉載唐姜師度好奇詭爲滄州刺史兼按察造  
檣車運糧開河築堰州縣鼎沸于魯城界內種稻置  
屯穗蟹食盡又差夫打蟹告之歌曰魯地一種稻一  
槩被水沫年年索蟹夫百姓不可活

蟹行

蛇行史形容蘇秦兄妻耳張起蟹行索妃又孔平仲  
詩小女作蟹行

水類

宋俞琰曰水類出水卽死風類入水卽死然有出入  
之類者龜蟹鵝鳧之類是也

水族

夏侯嘉正洞庭賦水之族將如何居神曰大道變易  
或文或質沉潛自遂其類非一或被甲而遁或曳裙  
而牙或禿而跋或角而蜿或吞而呀或呿而牙或心  
以之蟹或目以之蝦或修臂而立或橫驚而疾或髮  
於首或髯於肘或儼而莊或毅而黝彪彪玢玢若太  
虛之含萬彙各備其生而合乎群者也

博帶

李白詩霜寒博帶肥

班師

宋史列傳曹翰從征幽州攻城東南隅卒掘土得蟹以獻謂諸將曰蟹水物而陸居失所也且多足彼援將至不可進拔之象况蟹者解也其班師乎已而果驗

李漁買命

李笠翁平生嗜蟹以蟹爲命每于蟹未出時卽儲錢以待自呼其錢曰買命錢

漁人爲厭

岳陽風土記江蟹大而肥第殼軟漁人以爲厭曰云網中得蟹無魚可賣人亦罕食近差珍貴

舟楫爲食

廣爲水國人多以舟楫爲食弱齡男女崽身手便利  
卽張羅竿首盡釣泥中鼈蟹蜃蛤之入日給有餘不  
須衣食父母

待制批答

陳隨隱漫錄姑蘇守臣進蟹待制程奎草批答云新  
酒菊天惟其時矣上曰茅店酒旗語豈王言耶令陳  
藏一擬聞先臣援筆立成畧曰內則黃中通理外則  
戈甲森然此鄉出將入相文在中而橫行之象也

古今諺

螃蟹怕見漆豆花怕見日

小四海

孫節度承佑一宴殺物命千數每謂人今日富有小四海矣謂南螯蚌北紅羊東蝦魚西棗栗皆備也

尤楊雅謔

鶴林玉露尤梁溪延之博洽工文與楊誠齋爲金石交淳熙中誠齋爲秘書監延之爲太常卿又同爲青宮寮案無日不相從二公皆善謔延之嘗曰有一經句請秘監對曰楊氏爲我誠齋應曰尤物移人衆皆歎其敏確厥後閒居書問往來延之則曰羔兒無恙

誠齋則曰彭越安在延之先卒誠齋祭文曰齊歌楚  
些萬象爲挫瓊偉詭譎我倡公和放浪諧謔尚友方  
朔巧發掇出公嘲我醉

螃蟹戲對

暖姝由筆一御史巡按松江與太守有舊席間戲謂  
之曰鱸魚四腮一尾獨占松江太守應云螃蟹八足  
二螯橫行天下

常州府學教授陳旺先生有學而慙常得銀鑿壁磚  
藏之外朱書曰此處並無銀八錢後被人取去每過  
生員家飲酒無間趙同知某戲出對云溪邊螃蟹渾

身脚陳號北溪故也陳對曰簷外蜘蛛一肚絲趙疑其譏已啣之

腥涎褻味

元吳萊甬東古蹟昌國中多大山四面皆海人家頗居篁竹蘆葦間或散在沙塢非舟不相往來田種少類入海中捕魚螭蚌蛇母禪塗傑步腥涎褻味逆人鼻口

橙熟蟹肥

洪舜俞老圃賦荻生而河豚上橙熟而蟹螯肥指雖動而莫酌腹不負其幾希

獠羞

昌黎城南聯句楚膩鱸鮓亂獠羞螺蟹并又驚魂見  
蛇蚓觸嗅值蝦蟇

歲貢

十三州志扶柳縣東北有武陽城又北爲博廣池池  
多名蟹佳蝦歲貢王朝以供膳府

魚蟹饒

明李濂游百泉記蘇門之麓有思親亭許師可爲衛  
輝路總管以其父魯齋嘗寓共城思之爲立亭過亭  
爲衛源廟世稱靈源公殿曰清輝郡邑之得名曰輝



以此宋元皆封王至洪武初釐正祀典改稱衛源之神  
禱雨輒應廟中刻碑具載唐宋以來褒封之典近  
廟有湧金亭泉仰出縷縷千萬窠滙爲巨池池方廣  
一頃餘日照之如金故名中有菰蒲荇藻魚蟹之饒  
亭正壁有蘇東坡書

螃蟹徐

四明城中有徐姓民婦嗜螃蟹每秋時其夫于海濱  
拾螃蟹數十以繩貫之攜歸乃婦烹蟹大嚼棄繩于  
戶外久之纍纍然成堆一日婦早起推窗望積繩處  
如數百鬼現前大驚得病臥床數日時時言螃蟹繞

身刺我遂痛楚呼號卒至今人稱爲螃蟹徐或云捫蟹徐

### 蟹行

彈琴輪指曰蟹行側轉指曰鸞鳴若全用甲則聲乾而多悲思全用肉則聲重濁而不勻

### 蟹一

洪陽洞有不形如蟹大小數十枚有石龜石形如龜伏于洞中有石螺石形如螺色白如玉

### 釣蟹

廣東新語蟹之美在膏而其容善於俯仰俯以八足之折故曰跪仰以二螯之倨故曰螯螯者敖也以螯

教人故昔人食蟹上螯今則上膏予村居多暇秋日  
輒出扶胥釣蟹有詩云紫蟹得霜肥銜禾上釣磯閒  
垂兄弟釣更得白魚歸兄弟釣本以釣河豚者鱗觸  
之亦往往多得

### 水傀儡戲

酌中志宮中水傀儡戲每游移動轉水內用活魚蝦  
蟹螺蛙鰕萍藻之類浮水上

### 巧對絕怪

暖姝由筆一舉子旅店中聞樓下一人出對云鼠偷  
蠶繭渾如獅子拋毬思之不能對至死魂常往來樓

中誦此對人不敢止後一舉子強欲上樓夜中果有  
誦此對者乃答曰蟹入魚罾却似蜘蛛結網怪遂絕  
喫語辱賓

伽藍記楊元慎口含水喫慶之曰吳人之鬼住居建  
康小作冠帽短製衣裳自呼阿儂語則阿傍菰稗爲  
飯茗飲作漿呬啜鱗羹啜啍蟹黃手把豆蔻口嚼檳  
榔乍至中土思憶本鄉急急速去還爾丹陽慶之伏  
枕曰楊君見辱深矣

### 彭越復生

漢高祖殺彭越覆其醢江中化爲蟹因名彭越至獻

月入名金卷之二  
帝時彭越復托生爲劉備卒分漢室出通鑑博論

送蟹入釜

許棐獻醜集攜魚上砧送蟹入釜無不惻然及坑才  
陷藝惟恐不深是不忍於細而忍於大

狂客索酒

玄亭閒話狂客過豪家索酒適見有饋魚蟹者未出  
客曰孟嘗門下焉得無魚吏部盤中定須有蟹一女  
奴出將母命答曰主人不殺已付校人畜去上客先  
期都爲學士嘗空

地諱

各省皆有地諱莫知所始如湖廣曰乾魚江南曰水蟹

### 地氣

草木子江之水族如楊子大江族類各有所限江蟹至潯陽則少鱮魚至鴨欄磯則少麴條魚惟城陵磯冬至前後始有之其理猶鸛鵒不踰濟貉踰淮而死當由地氣始然謝華啓秀云江蟹不過官亭湖時魚不過鴨欄驛

### 蟲類

邵子曰陸生之物水中必具猶形之於影也巨於陸

者水中必細細於陸者水中必巨今試推之魚飛鳥類也龍蝦類也蟹蜘蛛類也蝦蟇類也石虱蠹類也石蠹蠹類也龜鱉甲蟲類也螺螄胎生類也鼃域走類也蛆鼃倮蟲類也

水利

褚稼軒曰吳爲澤國湖蕩水濱編竹設簾可專魚蟹芟芡之利惟有勢力者可得之西湖亦然近見杭人謠曰十里湖光十里筩編筩都是富豪家待他十載功名盡只見湖光不見筩

秋時

清閑供秋時日脯持蟹螯鱸膾酌海川螺試新釀醉  
弄洞簫數聲

文比

詩人玉屑東坡嘗云黃魯直詩文如螭蟬江珧柱格  
韻高絕盤飧盡廢然不可多食多食則發風動氣野  
客叢書解云詩文比之螭蟬江珧柱豈不謂佳至言  
發風動氣不可多食者謂其言有味或不免譏評時  
病使人動不平之氣乃所以深美之非譏之也

敖兵

埤雅敖蓋蟹首二鉗如鉞者敖蓋其兵也所以自衛



趙屯蟹

黃庶宿趙屯詩菱芡與魚蟹居人足來去

解城

解城在桑泉之南以蚩尤體解名集韻音蟹

腹蟹

堅瓠集常聞善啖者腹有肉鼠能飲者腹有酒蟹

蟹堞

野客叢書說苑載淳于髡穰田之詞曰蟹堞者宜禾  
滂邪者滿車傳之後世洋洋有餘又祝曰下田滂邪  
得穀百車蟹堞者宜禾荀子注引淳于髡祠田祝曰

蟹螺者宜禾蟹螺高地也音果史記戰國策蟹螺作  
甌窶甌窶猶培塿也又原蟹可對地蛇見莊子

鮎埼

漢書鄴有鮎埼亭梅聖俞送鄴宰詩君行問鮎埼指  
此

呼佛

瓠續集唐天寶間宣城劉成舟中聞蟹呼佛

金液

李太白詩蟹螯卽金液糟丘是蓬萊

四行所屬

乾坤體義二十八宿各有其性而難辨若十二房者  
白羊獅子人馬稟火性金牛磨羯室女稟土性雙兄  
天秤寶瓶稟氣性巨蟹天蠍雙魚稟水性四元行謂  
火土水氣  
也雙兄室女曆家錯  
爲陰陽雙女今正之

### 蟹缸

姚涑字惟東浙江慈谿人初赴會試出江遇蟹缸相  
觸有聲涑問故家人答曰斷船搖來撞頭衆聞之謂  
語讖之佳相賀吳音以斷然姚涑狀頭果大魁

### 蟹圖

江夏吳小仙偉字魯夫一字次翁幼寓金陵工山水

人物薦入仁智殿供奉孝廟賜畫狀元印一日飲友  
人家酒闌請作畫小仙將蓮房濡墨印紙上數處皆  
莫測其意少頃縱筆揮酒成捕蟹圖最爲神妙

倡和蟹詩

挑燈集異昔宋賈收耘老能詩隱居茗城南橫塘上  
吳興東林沈偕君與者以蟹詩遺之曰黃杭稻熟隊  
西風肥入江南十月雄橫跪蹢躅鉗齒白圓臍吸脇  
斗膏紅薤須園老香研柚羹藉庖丁細劈葱分寄橫  
塘溪上客持螯莫放酒杯空耘老得之不樂曰吾未  
之識後進輕我且聞其不羈因和韻詆之云彭越孫

多伏下風螭婢奴視敢稱雄江湖縱養膏腴紫鼎鑊  
終烹爪眼紅嘲稱吳兒牙似鍍劈慚湖女手如葱獨  
憐盤內秋臍實不比溪邊夏殼空君與怒日吾聞賈  
多與郡將往還預政言人短長曾與人所訟吾以長  
上推之乃鄙我如此復用韻報之云蟲腹無端苦動  
風團雌還却勝尖雄水寒且弄雙鉗利湯老難逃一  
背紅螻入幾家煩海涵臨城何處污園葱好收心躁  
潛蛇穴母使雷驚族類空賈晚娶真氏時謂賈秀才  
娶真縣君以爲笑沈所指團雌爲此近有一跖弛士  
作蟹詩云五月黃梅觸處生蛟龍魚鼈混爲朋身羅

甲冑將軍勇口吐珠璣辯士精食草池堦雖暫隱輸  
芒大海自橫行秋風志在肥天下那怕人間鼎鑊烹  
律韻雖失而氣則雄壯矣

徙州

宋史喬維岳傳維岳體肥年衰難于拜趨上特授海  
州刺史咸平中知蘇州素病風上以吳中多魚蟹乃  
徙壽州

漆畏蟹

蘇軾題跋予嘗使工作漆器工以蒸餅潔手而食之  
宛轉如中毒狀亟以蟹食之乃甦

服漆

抱朴子淳漆不沾者服之則令人通神長生餌之法或以大無腸公子或云大蟹十枚投其中或以雲母水或以玉水合服之九虫悉下惡血從鼻去一年六甲行厨至也

穀害

論衡陸田之中時有鼠水田之中時有魚蝦蟹之類皆爲穀害

擗蟹

抱朴子以臭雉之甘呼鴛鳳擗蟹之計要猛虎豈不

陋乎

畫譜

宣和畫譜李延之雙蟹圖徐熙蓼岸龜蟹圖袁義魚蟹圖御府所藏

石譜

雲林石譜廣連豐柳等山多鍾乳洞洞有石龜蟾蟹  
蝦蟇及果蓏一一堅貞或顏色如生蓋因鍾乳點化  
成石

枯蟹

癸辛雜識余嘗侍先子觀潮有道人負一簍自隨啓



而視之皆枯蟹也

龜蟹

陸希聲山居記決于畊竇使龜蟹爲災決于沮洳使  
鼃黽得志

川澤之實

左傳山林川澤之實疏山林之實謂材木樵薪之類  
川澤之實謂菱芡魚蟹之屬

土貢

唐書地理志滄州土貢糖蟹鱧鱉江陵郡土貢白魚  
糖蟹

捕魚蟹

北史魏宗室傳咸陽王坦性好畋漁秋冬獵雉兔春夏捕魚蟹

詔禁蝦蟹

北史齊文宣帝天保八年春三月大熱人或暍死夏四月庚午詔禁取蝦蟹蜺蛤之類唯許私家捕魚

蟪蛄簽

玉食批以蟪蛄爲簽爲餽餽爲根瓮止取兩螯餘悉棄之地謂非貴人食有取之則曰若輩真狗子也

晴川後蟹錄卷之一  
終